

Segun Marlon Werleman

‘Linear Park’ bunita iniciativa di AHATA na 2006 a keda mancha negativamente den ehecucion!

DIASABRA awor porfin e ‘Linear Park’ ta wordo inaugura! Un proyecto cu a bira un pesadiya y un trauma pa Minister Otmar Oduber! Pasobra ora colega di Minister Otmar Oduber, esta Juan David Yrausquin a declara publicamente cu e compania amigo di e Minister, esta Prosuinca, mester wordo poni riba ‘blacklist’ y no mag haya ningun proyecto mas’ esaki ta bisa hopi caba, Esaki ta indica cu berdad den AVP mes tin hende cu no ta di acuerdo cu e forma amateur cu e proyecto di ‘Linear park’ a keda ehecuta, segun Marlon Werleman.

Na final di 2006 e CEO y President di AHATA e tempo ey,

sr. Jorge Pesquera, a presenta e proyecto di Linear Park na Comision di Turismo di Parlamento. Un bunita iniciativa di e compania di consultant EDSA y adopta pa AHATA. E proyecto di ‘Linear Park’ ta pa crea e parke di mas largo den Caribe den cual lo mester a mehora, drecha of eleva e producto turistico di nos isla. Den esaki lo mester tene cuenta cu e.o e naturalesa, proteccion di nos zona costal-beach, infraestructura, landscaping y crea un ambiente mas bunita, limpi y zonificacion di e parti o coridor turistico.

E proyecto aki di e parke mas largo lo core for di Aeropuerto te na Arashi. “Linear Park’ manera presenta e tempo ey dor

di Presidente di AHATA tabata proyecta pa wordo ehecuta den 15 aña.

Mas importante AHATA a pone infasis e tempo ey cu “Linear Park’ por wordo ehecuta pa nos companianan local di construcion mes. Esaki ta garantisa tambe trabou riba largo plazo pa companianan local. Bunita iniciativa cu Gobierno di MEP e tempo ey a acepta y a instrui e departamentonan concerni pa cuminsa prepara e masterplan aki.

Na 2009 Gobierno a tuma e decision pa cuminsa pone placa den presupuesto pa inicia e proyecto grandi y ambicioso aki cual na final mester a bira un proyecto bunita pa nos isla.

Minister di Turismo, Otmar Oduber a haci ehecucion di ‘Linear Park’ casi algo personal na unda cu el a duna ordo pa bypass e openbare aanbesteding y duna su amigonan di Venezuela e proyecto aki pa ehecuta ‘bou man’ pa 50% di e suma manera calcula inicialmente pa exper-tonan di DOW.

‘Linear Park’ cu den historia politico di nos pais lo keda recorda tambe como un proyecto mal ehecuta, mal calidad y cu a conoce hopi critica y cuestiona p’e tempo cu el a dura, segun Marlon Werleman. Un cantidad di sub-contractor cu a bin y bay di e proyecto. Un proyecto cu mester tabata un joya di un proyecto a converti su mes den



un pesadia y trauma pa Minister di Turismo y Gobierno di Mike Eman. Kico tur a pasa rond di ehecucion di e proyecto di ‘Linear Park’ y su gasto total pa awor ta keda un misterio pa pueblo, pero un dia tur e berdad tras di e proyecto aki lo sali, segun e recien re-ingresa Marlon Werleman den partido MEP.